

每週經課朗誦經文(巴克禮漢羅/教羅)2013/11/10

共同經課 - 1 哈該書一章十五節~二章九節

15 這是 tī Tāi-lī-ō 王二年，六月二十四日。1 七月二十一日，耶和華 ê 話託先知哈該 講，2 你 tiòh kā 猶大 ê 總督 Sat-láh-thiat ê kiáⁿ, Só-lò-pa-pek, kap Iok-sat-tap ê kiáⁿ, 祭司頭約書亞，以及所 chhun ê 百姓講，3 Lín 中間 iáu tī-teh ê 人，有 chī-chhui bat 看見 chit 間殿從前 ê 榮光 mah? 現在 lín 看了怎樣 ah? kiám m̄ 是 tī lín ê 目矚看親像無 mah? 4 耶和華講，Só-lò-pa-pek ah, 你 tiòh 勇敢；Iok-sat-tap ê kiáⁿ, 祭司頭約書亞 ah, 你亦 tiòh 勇敢；耶和華 koh 講，Chit 所在 ê 百姓 ah, lín 亦 tiòh 勇敢，亦 tiòh 做工，因為我 kap lín tī-teh；這是萬軍 ê 耶和華講 ê。5 當 lín 出埃及 ê 時，我 kap lín 立約 ê 話，我 ê 神 tiàm-tī lín 中間；lín 莫得驚。6 因為萬軍 ê 耶和華 án-ni 講，Koh 無 joā 久，我 beh koh 一 pái 振動天 kap 地 kap 海 kap 乾地。7 我 beh 振動萬國，萬國所欣慕 ê beh 來；我就 hō 榮光充滿 chit 間殿；這是萬軍 ê 耶和華講 ê。8 萬軍 ê 耶和華講，銀是我 ê，金亦是我 ê。9 Chit 間殿後來 ê 榮光，beh 贏過前 ê 榮光；這是萬軍 ê 耶和華講 ê；koh tī chit-ê 所在，我 beh 賞賜平安；這是萬軍 ê 耶和華講 ê。

共同經課 - 2 詩篇一百四十五篇一節~五節，十七節~二十一節

1 大衛 o-ló ê 詩。1) 我 ê 上帝我 ê 王 ah, 我 beh 尊你做高，我 beh 永遠 o-ló 你 ê 名。2 我 beh 日日祝謝你；亦 beh 永遠 o-ló 你 ê 名。3 耶和華至大，應該受大 ê o-ló；伊 ê 大到 boē 測度得。4 Chit 代 beh 對 hit 代 o-ló 你 ê 所做；亦 beh 報揚你大權能 ê 事。5 我 beh 靜靜想你尊貴榮光 ê 威嚴，Kap 你奇妙 ê 所做。17 耶和華 tī 伊一切所行 ê，無 m̄ 公義，Tī 伊一切所做 ê，lóng 有慈愛。18 凡若求叫耶和華 ê，耶和華 kap in 親近，就是親近 hiah-ê 誠實求叫伊 ê。19 敬畏伊 ê，伊 beh 成 in ê 心所 ài；亦 beh 聽 in ê 求叫，來拯救 in。20 耶和華保護一切疼伊 ê 人；總是一切做 pháiⁿ ê 人，伊 beh 滅無 in。21 我 ê 嘴 beh 講出 o-ló 耶和華 ê 話；願見有血氣 ê，lóng 永遠 o-ló 伊 ê 聖名。

共同經課 - 3 帖撒羅尼迦後書二章一節~五節，十三節~十七節

1 兄弟 ah, 論到咱 ê 主耶穌基督 ê 臨到，kap 咱 chiah-ê 聚集歸伊，阮求 lín, 2 無論 tùi 神，á 是 tùi 話，á 是 tùi phoe 假冒阮 ê 名 ê，講主 ê 日現在到 lah, lín ê 心志莫得快快搖動，也莫得驚惶；3 無論用甚麼法，一概莫得 hō 人引誘；因為 hit 日猶未到，的確事先有背教 ê 事，kap hit-ê 罪惡 ê 人，就是沉淪 ê 人，出現；4 伊是做對敵，也自高 poāⁿ 過一切稱做上帝 kap 受敬拜 ê；甚至坐 tī 上帝 ê 殿，表明做上帝。5 我 iáu kap lín tī-teh ê 時，bat 將 chiah-ê 事 kā lín 講，lín kiám boē 記得 mah? 13 但是主所疼 ê 兄弟 ah, 阮應該替 lín 常常感謝上帝，因為上帝 tùi 起頭揀 lín, beh hō lín 得救，是在 tī 神 ê 成聖 kap 信真理。14 為 tiòh chit-ê, 伊對阮所傳 ê 福音 bat 召 lín, 來得 tiòh 咱 ê 主耶穌基督 ê 榮光。15 所以，兄弟 ah, tiòh khiā 在；lín 所得 tiòh ê 傳授，無論是 tùi 嘴講 ê, á 是 tùi 阮 ê phoe, 凡所學習 ê, tiòh 執守伊。16 咱 ê 主耶穌基督，kap 咱 ê 父上帝，就是疼咱，也 tī 恩典將永遠 ê 安慰 kap 好 ê òng 望賞賜咱 ê, 17 願伊安慰 lín ê 心，堅固 lín tī 一切好 ê 所行，好 ê 所講。

共同經課 - 4 路加福音二十章二十七節~三十八節

27 有撒都該人，就是講人無 koh 活 ê，幾 nā ê 就近來問耶穌講，28 先生 ah, 摩西有記來指示阮講，若有人，伊 ê 兄死有 bó 也無 kiáⁿ, 伊 ê 小弟 tiòh 娶伊 ê bó, 生 kiáⁿ 來續接伊 ê 兄。29 Án-ni, 有兄弟七人，大 ê 娶 bó, 無 kiáⁿ 就死；30 第二個、第三個也娶伊；31 七個 lóng án-ni, 無留 kiáⁿ 就死去。32 後來婦人人也死。33 Án-ni, tī koh 活 ê 時，chit-ê 婦人人 beh 做 in 中間 tá-lòh 一個 ê bó? 因為 chit 七人 lóng 有娶伊做 bó。34 耶穌 kā in 講，Chit 世界 ê 人有嫁有娶；35 但是算做能堪得得 tiòh hit-ê 世界，也 tùi 死人中 koh 活 ê, 就無嫁無娶；36 因為也 boē 會 koh 死；是親像天使一樣；已經做 koh 活 ê 人，就做上帝 ê Kiáⁿ。37 論死人 koh 活，摩西 tī 刺 phè hit 篇有指明，稱呼主做亞伯拉罕 ê 上帝，以撒 ê 上帝，雅各 ê 上帝。38 伊 m̄ 是死人 ê 上帝，是活人 ê 上帝；因為眾人為 tiòh 伊來活。